

**Secretáriu Estadu Konseihu Ministrus no
Porta-Vóz Ofisiál Governu Timor-Leste
Ágio Pereira**



**29 Abril 2010
Dili, Timor-Leste**

**Governu Timor-Leste la simu Woodside nia konseitu kona-ba Plataforma
Flutuante GNL nian iha Sunrise**

Maski Woodside no nia parseirus konsórsiu sira fó hatene ona kona-ba opsau ne'ebé sira hakarak liu, kona-ba dezvoltamentu kampu gás iha Greater Sunrise, hanesan Plataforma Flutuante GNL ida, Timor-Leste hakarak dehan loloos de'it, katak sei la simu ka apoia konseitu ida ne'e no planu tomak ne'ebé kait ho konseitu ne'e, ba agora no mós futuru.

Konseitu Plataforma Flutuante GNL nian ne'e, la serve ba intereses povu Timor-Leste nian i tuir termus téknikus no komersiais la tetu ho kuidadu.

Sekretáriu Estadu Konseihu Ministrus, S.E. Sr. Ágio Pereira, ohin repete tan fali pozisaun Governu nian ne'e: "Nasaun ne'e sei haka'as-an tomak atu hari indústria petrolífera iha rai-laran, ne'ebé inklui gazodutu ka kadoras gás nian entre kampu Greater Sunrise ho Timor-Leste. Governu sei la aprova naran dezvoltamentu ida kona-ba Greater Sunrise, ne'ebé la inklui dada kadoras gás mai Timor-Leste."

Governu konsidera anúnsiu Woodside hanesan lakon leet tempu, osan no kapitál umanu. La iha sentidu apresenta konseitu ida ne'ebé dehan dí'ak liu, enkuantu seidak halo uluk lai konsulta ho "rikusoin na'in rasik sira".

Woodside hatene momoos hela pozisaun Governu antes-de halo anúnsiu ne'e ohin, maibé hakarak nafatin avansa ba oin. Hahalok ne'e, alein-de hamosu preokupasaun boot ida, hatudu momoos nível arrogânsia ka foti-an ida ke ita labele simu. Abordajen ida hanesan ne'e sei kompromete maka'as relasoens aban-bain rua ho Governu Timor-Leste.

Sekretáriu Estadu Rekursus Naturais Timor-Leste, S. Exa. Alfredo Pires, dehan: "Ba Timor-Leste, progresu projetu Sunrise foin iha faze inisiál, ne'ebé sei dook tebes atu hetan kualkér aprovasaun kona-ba naran planu dezvoltamentu ida. Tenke hanoin mós katak Woodside ho nia parseirus konsórsiu sira seidak fó resposta ba kestoens téknikas pendentas, ne'ebé instituisaun reguladora, Autoridade Nasionál Petróleu (ANP), nu'udár instituisaun públika Timor-Leste nian ida, husu ba sira."

'Agora sei iha tán kestoens fiskais no reguladores barabarak, hamutuk ho akordus ho karáter komersiál, relasiona ho prosesamentu gás ne'ebé tenke negosia, estabelese no aprova uluk lai, inklui kestaun kona-ba atu lori lós bá ne'ebé, parte gás ne'ebé pertense ba Timor-Leste.'

'Timor-Leste sei la aprova ka simu naran akordu ida ne'ebé la inklui dada kadoras gás ho hari instalaun GNL ida iha territóriu Timor-Leste laran. Woodside preziza rekonhese ida ne'e i labele kontinua bosok povu.'

"Ami nia Governu hala'o ona estudus detalhadus hodi konsege konfirma katak iha viabilidade téknika no komersiál atu dada kadora gás mai Timor-Leste. Konkluzoens hanesan ne'e empresas internasionais enjenheria nian balu mak konfirma rasik. Hatene

**K
M
O
K
-
N
-
Z
-
K
-
A
D
U
B
A
-
I
M
P
R
E
N
S
A**

katak ida ne'e opsaun ida ke teknikamente bele hala'o, no komersialmente mós di'ak tebetebes, entaun tansá mak ita tenke simu fali konseitu ka hanoin ida ke la hanesan?'

'Timor-Leste ho Austrália halo tratadus no akordus kona-ba dezvoltimentu rekursu iha Tasi Timor ba *povu rua ne'e nia benefisiu rasik*. Ami la halo hanesan ne'e atu lori serve fali interesas komersiais. To'o agora Austrália hetan ona benefisius barak husi Bayu Undan iha Tasi Timor laran, tanba ne'e mak to'o ona tempu atu kadoras gás husi Greater Sunrise dada mai Timor-Leste. Ida ne'e mak solusaun mesak ida ne'ebé ekuitativa ka hanesan ba ita hotu, hodi bele kumpri obrigasoens iha tratadu. Ne'e mós hanesan forma ida hotu atu empresas ne'ebé funsiona tuir rejime tratadu ida agora nian, bele kumpri loloos sira nia obrigasoens."

Governu Timor-Leste sei kontinua halo planu no dezvoltolve indústriá petróleu ho gás iha rai laran, buat ne'ebé konsidera hanesan aspetu esensial tebes ba dezvoltimentu estruturas ne'ebé kait ho ekonomia, no mós atu bele hasai timór-oan tomak husi moris-kiak.

Kona-ba informasoens seluktán favór kontakta:

Francisco da Costa Monteiro +670 7357 240
José Aragão Azevedo + 670 7268 359

Ágio Pereira +670 723 0011

Correio electrónico:

agiopereira@cdm.gov.tl

ou

govtlmedia@gmail.com

Portal electrónico:

www.timor-leste.gov.tl